



13. august 2010

UKA 2010/31

Inatsisartut Suleriaasianni § 32 naapertorlugu aalajangiiffigisassatut siunnersuut imaaattoq matu-muuna saqqummiuppara:

**Koorortuut timmiarsiutillu eqqarasuartartuunngitsut akuersissuteqarnissamik piumasa-qaatinut ilanngunneqarnissaat, taamatullu aamma qanoq inissinneqarnissaannut nalunaarsornissaannullu malittarisassaqarnissa, sakkunillu pigisaqarnermik tammaasaqar-nermillu nalunaaruteqartussaatitaanissaq aammalu sakkunik pineqartunik sakkunillu eqqarasuartartunik inuussutissarsiutigalugu piniarnermut atugassanik pisaarnissamut 16-inik ukioqalereersimanissamik piumasaqaateqalernissa siunertaralugu Nunatsinni sak-kuut pillugit inatsisiliornerup sukannerulerersinnissa anguniarlugu Naalakkersuisut danskit naalakkersuisuutin saaffiginnissuteqarnissamik peqquneqarnissaannik Inatsisar-tut aalajangiiffigisassaattut siunnersuut.**

(Inatsisartunut ilaasortaq Justus Hansen, Demokraatit)

**Tunngavilersornera:**

Sakkuuteqarneq ileqqutsinnut kulturitsinnullu ilaavoq. Siulivut ilaqtuttaminnik pilersuiniarlutik piniariaraangamik sakkuutitik pinngitsoorsinnaanngilluinnartarpaat. Inuit sakkuutitaarnissaat ajornarnerulersinniarlugu imatut siunnersuuteqarnitsigut anguniagarinngilarput, kissaatigaarpulli inuiaqatigiit inuit aalajangersimasut sakkuutitaarsinnaatitaannginnissaannik qinigassaqartinnisaat. Assersutigineqarsinnaapput aallaasit atorlugit inoqammut navianartumik pinerluuteqarsimasutut pineqaatissinneqarsimasut.

Tamanna angussagaanni kikkut aallaasinik pigisaqarnersut qanoq ittunillu pigisaqarnersut paasil-luwartariaqarpalput. Taamaammat aallaasit tamaasa nalunaarsorneqartalernissaat isumassarsiatsia-lattut isigaarput, taamaaliornikkut kikkut aallaasinik ataasiakkaanik pigisaqarnersut ilisimaneqa-lissamat.

Peqatigisaanik aallaasit taakku qanoq inissinneqartarnissaasa malittarisassiunneqarnissaat kis-saatigaarput. Aallaasit illersorneqarsinnaanngitsumik inissinneqartarerat iluaqtissartaqanngilaq. Demokraatit isumaqarput aallaat parnaarsaataalu immikkoortillugit inissisimatinnneqartarnisaat minnerpaaffiliussatut piumasaqaatigineqartariaqartoq, taamaaliornikkut aallaat tillinneqas-sagaluarpat atorsinnaannginniassamat. Aallaat parnaarsaataalu sikaavimmut, amusarissamut assigisaanulluunniit parnaarullugit inissisimatinnneqartassapput.

Aammattaaq aallaasitaarnissamut aallaammillu atuinissamut ukiutigut killiussaqalersitsinissaq pingaartippalput, meeqqat inuuusuttuaqqallu 16-it inorlugit ukiullit taamaasillutik aallaasinik atuinissamut killilerneqassammata. Sakkut pillugit inatsisiliornerup taamatut allanngortinneqarne-ratigut Namminersorlutik Oqartussat Sunngiffimmi aallaaniarnissamut akuersissutit pillugit na-lunaarutaanni 12-inik ukioqalereersimanissamik piumasaqaammik Naalakkersuisut allanngorti-sariaqarnissaannik kinguneqarnissa soorunami eqqumaffigaarput.

Tamatuma saniatigut aalajangiiffigisassatut siunnersuummut ilanngussaq unnersuussutigissava-ra, Naalakkersuisullu akissuteqaatissaat kiisalu partiit allat oqaaseqaataasa tusarfiginissaat qila-naalarlugu.



## **Ilanngussaq**

Nunatsinni sakkut pillugit inatsit atuuttoq 1992-imeersuuvoq. Inatsimmullu tassunga nalunaarutit sisamat atulersinneqarsimallutik.

Politimesterimit akuerineqaqqaarluni aallaasinik aalajangersimasunik pisaartoqarsinnaasoq atui-soqarsinnaasorlu sakkut pillugit inatsimmi aalajangersarneqarsimavoq. Koorortuut timmiarsiutillu eqqarasuartartuunngitsut sakkoqarnissamut akuersissuteqarnissamik piumasaqaammut ilaatin-neqanngillat. Aallaasilli eqqarasuartartut nutsuinnartakkallu akuersisummmik piumasaqaateqartussaapput. Aallaasit nutsuinnartakkat ilaat akuersisummmik piniaqqaarani pissarsiarineqarsin-naapput atorneqarlutilu, aallaasitaarniartoq/piginnittooq inuussutissarsiutigalugu piniartutut allagartaqarpat, sakkut ilanngunneqanngitsut pillugit nalunaarut takuuk.

Akuersissutit inunnut inoqatiminntu pissusilersornermikkut eqqarsarnartunik iliorsimanerannut tunngasunik paasissutissaqanngippat aatsaat akuersisummmik tunineqarsinnaapput.

Sakkoqarnissamut akuersissut ukiut tallimakkuutaarlugit nutarterneqartussaavoq, aammalu qa-qugukkulluunniit atorunnaarsinneqarsinnaalluni. Akuersisummut siullermut akiliut 840 kr.-iuvoq, kingornatigullu akuersissutinut allanut 420 kr.-iulluni.

Politimesteri akuersissuteqarnermini, isumannaallisaaneq eqqarsaatigalugu, aallaasip inissinnisanut atorsinnaaneranullu piumasaqaatit aalajangersortarpai. Aallaat akuersissuteqartussaq tammassagaluarpat, tamanna erngertumik politiinut nalunaarutigineqartussaavoq.

Aallaasinik, tassunga ilanngullugit koorortuunik timmiarsiutinillu eqqarasuartartuunngitsunik, pisaarsinnaajunnaarsitsinissamut pigisaqarsinnaajunnaarsitsinissamullu, sakkut pillugit inatsit tunngavissaqartitsinngilaq. Aamma sakkut pillugit inatsimmi sakkunik taama ittunik qanoq inissiinissamut malittarisassaqaranilu malittarisassiuussinissamut tunngavissaqanngilaq. Aammatataaq sakkut pillugit inatsimmi aallaasinik akuersissuteqarfigisariaqanngitsunik pigisaqarnermik tammaasaqarnermillu nalunaaruteqartussaanermik malittarisassaqanngilaq, imaluunniit aallaasit taama ittut normumik upfernarsaammik nalunaarsornissaannik piumasaqaateqarani.

Koorortuut timmiarsiutillu eqqarasuartartuunngitsut akuersissuteqarnissamik piumasaqaammut ilanngunneqarnerisigut Nunatsinni sakkut pillugit inatsisiliorneq sukannernerulersinneqassappat, peqatigisaanik aallaasit taakku inissiinissamut piumasaqaatinut, kiisalu nalunaarsuinissamik malittarisassanut aammalu pigisaqarnermut tammaasaqarnermillu malittarisassanut ilanngunneqarnissaat anguneqassaaq.

Sakkut pillugit inatsisip allanngortinneqarnissa pillugu apeqquteqaat aallaavigalugu oqallinnissamut siunnersuut Inatsisartut 2008-imi ukiakkut ataatsimiinneranni suliarineqarpoq. Siunnersuut Jens B. Frederiksen-imit Demokraatineersumit saqqummiunneqarpoq. Taaman Ni Naalakker-suisuusut sakkunik inissiinissamut atuinermillu ersarinnerusunik malittarisassiorqarnissaa akissuteqaateqarnerminni isumaqataaffigaat naalagaaffimilu oqartussaasunut tamanna saaffigin-nissutiginiarlugu neriorsuuteqarlutik.



Taamatut neriorsuuteqarneq eqquutsinnejarsimansoq, naalagaaffimmilu oqartussaasunut saaf-figinnitoqarsimassappat tamanna qanoq kinguneqarsimassanersoq, siunnersuuteqartup ilisimanngilaa.

Paasinaporli sakkut pillugit inatsisiliornermi kingornatigut allannguuteqartoqarsimanngitsoq, atomi atorlugu sakkussianik, sakkut akuutissanik ulorianartunik akullit, bakteerissat napparsimilersitsisartut atorlugit sakkussiat kiisalu qaartartut igeriuttakkat, qaartartut siammakalallutik qaartartut, qaartartut nunamut assaanneqartartut qinngornerillu atorlugit sakkussianik inuinnaat pigisaqaqqusaajunnaarnerannik nalunaarusiortoqarsimanera eqqaassanngikkaanni (!)

2008-mi ukiakkut ataatsimiinnerup kingorna Inatsisartunut qinersisoqarpoq. Taamanikkut Naalakersuisuusut neriorsuutaannik maanna Naalakersuisuusut pituttugaanngillat. Sakkut pillugit inatsisiliornerup sukannernerulersinneqarnissaata sulissutiginissaanut Naalakersuisut pisussaaf-filerneqarnissaannik Inatsisartut kissateqassappata, tamanna aalajangiiffigisassatut siunner-suummik, saqqummiunneqartup matuma assinganik, akuersinissaat pisariaqarpoq.